

御選語錄卷第二

林二

大智圓正聖僧肇法師論

九折十演者

開宗第一

無名曰經稱有餘涅槃無餘涅槃者秦言無

林三

為亦名滅度無為者取乎虛無寂寞妙絕於
有為滅度者言其大患永滅超度四流斯蓋
是鏡像之所歸絕稱之幽宅也而曰有餘無
餘者良是出處之異號應物之假名耳余嘗
試言之夫涅槃之為道也寂寥虛曠不可以

形名得微妙無相不可以有心知超羣有以
幽升量太虛而永久隨之弗得其蹤迎之罔
眺其首六趣不能攝其生力負無以化其體
潢漭惚恍若存若往五目不覩其容二聽不
聞其響冥冥窅窅誰見誰曉彌綸靡所不在

而獨曳於有無之表然則言之者失其真知
之者反其愚有之者乖其性無之者傷其軀
所以釋迦掩室於摩竭淨名杜口於毘耶須
菩提唱無說以顯道釋梵絕聽而雨華斯皆
理為神御故口以之而默豈曰無辯辯所不
能言也經云真解脫者離於言數寂滅永安
無始無終不晦不明不寒不暑湛若虛空無
名無說論曰涅槃非有亦復非無言語道斷
心行處滅尋夫經論之作豈虛構哉果有其
所以不有故不可得而有有其所以不無故
不可得而無耳何者本之有境則五陰永滅
推之無鄉而幽靈不竭幽靈不竭則抱一湛
然五陰永滅則萬累都捐萬累都捐故與道
通洞抱一湛然故神而無功神而無功故至
功常存與道通洞故沖而不改沖而不改故

不可為有至功常存故不可為無然則有無絕於內稱謂淪於外視聽之所不暨四空之所昏昧恬焉而夷泊焉而泰九流於是乎交歸衆聖於是乎冥會斯乃希夷之境太玄之鄉而欲以有無題榜標其方域而語其神道者不亦邈哉

數體第二

有名曰夫名號不虛生稱謂不自起經稱有餘涅槃無餘涅槃者蓋是返本之真名神道之妙稱者也請試陳之有餘者謂如來大覺始興法身初建澡八解之清流憇七覺之茂林積萬善於曠劫蕩無始之遺塵三明鏡於內神光照於外結僧那於始心終大悲以赴難仰攀玄根俯提弱喪超邁三域獨蹈大方啓八正之平路坦衆庶之夷途騁六通之神

林二

二

驥乘五行之安車至能出生入死與物推移道無不洽德無不施窮化母之始物極玄樞之妙用廓虛宇於無疆耀薩雲於幽燭將絕朕於九止永淪太虛而有餘緣不盡餘迹不泯業報猶魂聖智尚存此有餘涅槃也經云陶冶塵滓如鍊真金萬累都盡而靈覺獨存無餘者謂至人教緣都訖靈照永滅廓爾無朕故曰無餘何則夫大患莫若於有身故滅身以歸無勞動莫先於有智故絕智以淪虛然則智以形倦形以智勞輪轉修途疲而弗已經曰智為雜毒形為桎梏淵默以之而遼患難以之而起所以至人反身滅智捐形絕慮內無機照之勤外息大患之本超然與羣有永分渾爾與太虛同體寂焉無聞泊爾無兆冥冥長往莫知所之其猶燈盡火滅膏明

林一

三

俱竭此無餘涅槃也經云五陰永盡譬如燈滅然則有餘可以有稱無餘可以無名無名立則宗虛者欣尚於沖默有稱生則懷德者彌仰於聖功斯乃典誥之所垂文先聖之所軌轍而曰有無絕於內稱謂淪於外視聽之所不暨四空之所昏昧使夫懷德者自絕宗虛者靡託無異杜耳目於胎殼掩玄象於霄外而責宮商之異辨玄素之殊者也子徒知遠推至人於有無之表高韻絕唱於形名之外而論旨竟莫知所歸幽途故自蘊而未顯靜思幽尋寄懷無所豈所謂明大明於冥室奏玄響於無聞者哉

位體第三

無名曰有餘無餘者蓋是涅槃之外稱應物之假名耳而存稱謂者封名志器象者耽形

名也極於題目形也盡於方圓方圓有所不寫題目有所不傳焉可以名於無名而形於無形者哉難序云有餘無餘者信是權寂致教之本意亦是如來隱顯之誠迹也但未是玄寂絕言之幽致又非至人環中之妙術耳

子獨不聞正觀之說歟維摩詰言我觀如來無始無終六入已過三界已出不在方不離方非有爲非無爲不可以識識不可以智知無言無說心行處滅以此觀者乃名正觀以他觀者非見佛也放光云佛如虛空無去無來應緣而現無有方所然則聖人之在天下也寂莫虛無無執無競導而弗先感而後應譬猶幽谷之響明鏡之像對之弗知其所以來隨之罔識其所以往恍焉而有惚焉而亡動而逾寂隱而彌彰出幽入冥變化無常其

爲稱也因應而作顯迹爲生息迹爲滅生名有餘滅名無餘然則有無之稱本乎無名無名之道於何不名是以至人居方而方止圓而圓在天而天處人而人原夫能天能人者豈天人之所能哉果以非天非人故能天能人耳其爲治也故應而不爲因而而不施因而不施故施莫之廣應而不爲故爲莫之大爲莫之大故乃返於小成施莫之廣故乃歸乎無名經曰菩提之道不可圖度高而無上廣不可極淵而無下深不可測大包天地細入無間故謂之道然則涅槃之道不可以有無得之明矣而惑者覩神變因謂之有見滅度便謂之無有無之境妄想之域豈足以標勝玄道而語聖心者乎意謂至人寂泊無兆隱顯同源存不爲有亡不爲無何則佛言吾無

林二

五

生不生雖生不生無形不形雖形不形以知存不爲有經云菩薩入無盡三昧盡見過去滅度諸佛又云入於涅槃而不般涅槃以知亡不爲無亡不爲無雖無而有存不爲有雖有而無雖有而無故所謂非有雖無而有故所謂非無然則涅槃之道果出有無之域絕言象之運斷矣子乃云聖人患於有身故滅身以歸無勞動莫先於有智故絕智以淪虛無乃乖乎神極傷於玄旨者也經曰法身無象應物而形般若無知對緣而照萬機頓赴而不撓其神千難殊對而不干其慮動若行雲止猶谷神豈有心於彼此情係於動靜者乎既無心於動靜亦無象於去來去來不以象故無器而不形動靜不以心故無感而不應然則心生於有心象出於有象象非我出

故金石流而不焦心非我生故日用而不動
絃絃自彼於我何爲所以智周萬物而不勞
形充八極而無患益不可盈損不可虧寧復
痾癘中達壽極雙樹靈竭天棺體盡焚燎者
哉而惑者居見聞之境尋殊應之迹秉執規
矩而擬大方欲以智勞至人形患大聖謂捨
有入無因以名之豈謂採微言於聽表拔玄
根於虛壤者哉

徵出第四

有名曰夫渾元剖判萬有參分有既有矣不
得不無無不自無必因於有所以高下相傾
有無相生此乃自然之數數極於是以此而
觀化母所育理無幽顯恢愜怪無非有也
有化而無無非無也然則有無之境理無不
統經云有無二法攝一切法又稱三無爲者

虛空數緣盡非數緣盡數緣盡者即涅槃也
而論云有無之表別有妙道妙於有無謂之
涅槃請覈妙道之本果若有也雖妙非無雖
妙非無即入有境界若無也無即無差無而
無差即入無境總而括之即而究之無有異
有而非無無有異無而非有者明矣而曰有
無之外別有妙道非有非無謂之涅槃吾聞
其語未即於心也

超境第五

無名曰有無之數誠以法無不該理無不統
然其所統俗諦而已經曰真諦何耶涅槃道
是俗諦何耶有無法是何則有者有於無無
者無於有有無所以稱有無有所以稱無然
則有生於無無生於有離有無無離無無有
有無相生其猶高下相傾有高必有下有下

必有高矣然則有無雖殊俱未免於有也此乃言象之所以形是非之所以生豈足以統夫幽極而擬夫神道者乎是以論稱出有無者良以有無之數止乎六境之內六境之內非涅槃之宅故借出以祛之庶悖道之流鬚幽途託情絕域得意忘言體其非有非無林二豈曰有無之外別有一有而可稱哉經曰三無爲者蓋是羣生紛繞生乎篤患篤患之尤莫先於有絕有之稱莫先於無故借無以明其非有明其非有非謂無也

搜玄第六

有名曰論自云涅槃既不出有無又不在有無不在有無則不可於有無得之矣不出有無則不可離有無求之矣求之無所便應都無然復不無其道其道不無則幽途可尋所

以于聖同轍未嘗虛返者也其道既存而曰不出不在必有異旨可得聞乎

妙存第七

無名曰夫言由名起名以相生相因可相無相無名無名無說無說無聞經曰涅槃非法非非法無聞無說非心所知吾何敢言之而子欲聞之耶雖然善言有言衆人若能以無心而受無聽而聽者吾當以無言言之庶述其言亦可以言淨名曰不離煩惱而得涅槃天女曰不出魔界而入佛界然則玄道在於妙悟妙悟在於即真即真則有無齊觀齊觀則彼已莫二所以天地與我同根萬物與我一體同我則非復有無異我則乖於會通所以不出不在而道存乎其間矣何則夫至人虛心冥照理無不統懷六合於胸中而靈鑒

有餘鏡萬有於方寸而其神常虛至能拔元
根於未始即羣動以靜心恬淡淵默妙契自
然所以處有不有居無不無居無不無故不
無於無處有不有故不有於有故能不出有
無而不在有無者也然則法無有無之相理
無有無之知林二聖無有無之知則無心於內法
無有無之相則無數於外於外無數於內無
心此彼寂滅物我冥一泊爾無朕乃曰涅槃
涅槃若此圖度絕矣豈容可責之於有無之
內又可徵之於有無之外耶

難差第八

有名曰涅槃既絕圖度之域則超六境之外
不出不在而玄道獨存斯則窮理盡性究竟
之道妙一無差理其然矣而放光云三乘之
道皆因無爲而有差別佛言我昔爲菩薩時

名曰儒童於然燈佛所已入涅槃儒童菩薩
時於七住初獲無生忍進修三位若涅槃一
也則不應有三如其有三則非究竟究竟之
道而有升降之殊衆經異說何以取中耶

辨差第九

無名曰然究竟之道理無差也法華經云第
一大道無有兩正吾以方便爲怠慢者於一
乘道分別說三三車出火宅即其事也以俱
出生死故同稱無爲所稱不一故有三名統
其會歸一而已矣而難云三乘之道皆因無
爲而有差別此以人三三於無爲非無爲有
三也故放光云涅槃有差別耶答曰無差別
但如來結習都盡聲聞結習不盡耳請以近
喻以况遠旨如人斬木去尺無尺去寸無寸
脩短在於尺寸不在無也夫以羣生萬端識

根不一智鑒有淺深德行有厚薄所以俱之
彼岸而升降不同彼岸豈異異自我耳然則
衆經殊辯其致不乖

責異第十

有名曰俱出火宅則無患一也同出生死則
無爲一也而云彼岸無異異自我耳彼岸則
無爲岸也我則體無爲者也請問我與無爲
爲一爲異若我即無爲亦即我不得言
無爲無異異自我也若我異無爲我則非無
爲無爲自無爲我自常有爲冥會之致又滯
而不通然則我與無爲一亦無三異亦無三
三乘之名何由而生也

會異第十一

無名曰夫止此而此適彼而彼所以同於得
者得一得之同於失者失亦失之我適無爲

我即無爲無爲雖一何乖不一耶譬猶三鳥
出網同適無患之域無患雖同而鳥鳥各異
不可以鳥鳥各異謂無患亦異又不可以無
患既一而一於衆鳥也然則鳥即無患無患
即鳥無患豈異異自鳥耳如是三乘衆生俱
越妄想之樊同適無爲之境無爲雖同而乘
乘各異不可以乘乘各異謂無爲亦異又不
可以無爲既一而一於三乘也然則我即無
爲無爲即我無爲豈異異自我耳所以無患
雖同而升虛有遠近無爲雖一而幽鑒有淺
深無爲即乘也乘即無爲也此非我異無爲
以未盡無爲故有三耳

詰漸第十二

有名曰萬累滋彰本於妄想妄想既祛則萬
累都息二乘得盡智菩薩得無生智是時妄

想都盡結縛永除結縛既除則心無爲心既無爲理無餘翳經曰是諸聖智不相違背不出不在其實俱空又曰無爲大道平等不二既曰無二則不容心異不體則已體應窮微而曰體而未盡是所未悟也

明漸第十三

無名曰無爲無二則已然矣結是重惑而可謂頓盡亦所未喻經曰三箭中的三獸渡河中渡無異而有淺深之殊者爲力不同故也三乘衆生俱濟緣起之津同鑿四諦之的絕僞即真同升無爲然則所乘不一者亦以智力不同故也夫羣有雖衆然其量有涯正使智猶身子辯若滿願窮才極慮莫窺其畔况乎虛無之數重元之域其道無涯欲之頓盡耶書不云乎爲學者曰益爲道者曰損爲道

者爲於無爲者也爲於無爲而日日損此豈頓得之謂要損之又損之以至於無損耳經喻螢曰智用可知矣

譏動第十四

有名曰經稱法身已上入無爲境心不可以智知形不可以象測體絕陰入心智寂滅而復云進修三位積德彌廣夫進修本於好尚積德生於涉求好尚則取捨情現涉求則損益交陳既以取捨爲心損益爲體而曰體絕陰入心智寂滅此文乖致殊而會之一人無異指南爲北以曉迷夫

動寂第十五

無名曰經稱聖人無爲而無所不爲無爲故雖動而常寂無所不爲故雖寂而常動雖寂而常動故物莫能一雖動而常寂故物莫能

二物莫能二故逾動逾寂物莫能一故逾寂
逾動所以爲即無爲無爲即爲動寂雖殊而
莫之可異也道行云心亦不有亦不無不有
者不若有心之有不無者不若無心之無何
者有心則衆庶是也無心則太虛是也衆庶
止於妄想太虛絕於靈照豈可止於妄想絕
於靈照標其神道而語聖心者乎是以聖心
不有不可謂之無聖心不無不可謂之有不
有故心想都滅不無故理無不契理無不契
故萬德斯弘心想都滅故功成非我所以應
化無方未嘗有爲寂然不動未嘗不爲經云
心無所行無所不行信矣儒童曰昔我於無
數劫國財身命施人無數以妄想心施非爲
施也今以無生心五華施佛始名施耳又空
行菩薩入空解脫門方言今是行時非爲證

時然則心彌虛行彌廣終日行不乖於無行
者也是以賢劫稱無捨之檀成具美不爲之
爲禪典唱無緣之慈思益演不知之知聖旨
虛玄殊文同辯豈可以有爲便有爲無爲便
無爲哉菩薩住盡不盡平等法門不盡有爲
不住無爲即其事也而以南北爲喻殊非領
會之唱

窮源第十六

有名曰非衆生無以御三乘非三乘無以成
涅槃然必先有衆生後有涅槃是則涅槃有
林二
始有始必有終而經云涅槃無始無終湛若
虛空則涅槃先有非復學而後成者也

通古第十七

無名曰夫至人空洞無象而萬物無非我造
會萬物以成已者其唯聖人乎何則非理不

聖非聖不理理而爲聖者聖不異理也故天帝曰般若當於何求善吉曰般若不可於色中求亦不離色中求又曰見緣起爲見法見法爲見佛斯則物我不異之効也所以至人戢玄機於未兆藏冥運於即化總六合以鏡心一去來以成體古今通終始同窮本極末莫之與二浩然大均乃曰涅槃經曰不離諸法而得涅槃又云諸法無邊故菩提無邊以知涅槃之道存乎妙契妙契之致本乎冥一然則物不異我我不異物物我元會歸乎無極進之弗先退之弗後豈容終始於其間哉天女曰耆年解脫亦何如久

考得第十八

有名曰經云衆生之性極於五陰之內又云得涅槃者五陰都盡譬猶燈滅然則衆生之

性頓盡於五陰之內涅槃之道獨建於三有之外邈然殊域非復衆生得涅槃也果若有得則衆生之性不止於五陰必若止於五陰則五陰不都盡五陰若都盡誰復得涅槃耶

玄得第十九

無名曰夫真由離起僞因著生著故有得離故無名是以則真者同真法僞者同僞子以有得爲得故求於有得耳吾以無得爲得故得在於無得也且談論之作必先定其本既論涅槃不可離涅槃而語涅槃也若即涅槃以興言誰獨非涅槃而欲得之耶何者夫涅槃之道妙盡常數融冶二儀滌蕩萬有均天人同一異內視不已見返聽不我聞未嘗有得未嘗無得經曰涅槃非衆生亦不異衆生維摩詰言若彌勒得滅度者一切衆生亦當

滅度所以者何一切衆生本性常滅不復更滅此名滅度在於無滅者也然則衆生非衆生誰爲得之者涅槃非涅槃誰爲可得者放光云菩提從有得耶答曰不也從無得耶答曰不也從有無得耶答曰不也是義云何答曰無所得故爲得也是故得無所得也無所得謂之得者誰獨不然耶然則玄道在於絕域故不得以得之妙智存乎物外故不知以知之大象隱於無形故不見以見之大音匿於希聲故不聞以聞之故能囊括終古導達羣方亭毒蒼生疎而不漏汪哉洋哉何莫由之哉故梵志曰吾聞佛道厥義弘深汪洋無涯靡不成就靡不度生然則三乘之路開真僞之途辨賢聖之道存無名之致顯矣

林二

十四

寶藏論

空空非真空色可色非真色真色無形真空無名無名名之父無色色之母形與未質名起未名形名既兆遊氣亂清寂兮寥兮分兮別兮有善可稱有惡可名善人所重惡人所輕於是即是非而競生其智有解其愚有縛其妄有識其真有感非取而取非得而得是故理則無窮物則無極動兮亂兮內發三毒視兮聽兮外受五欲其心慌慌其身忙忙觸物動作如火煌煌故聖人立正教置真謨使無知之侶上下相依修無爲息有餘漸至乎如如如之理同本真軌不可以修證不可以希冀惟寂滅性耳夫真也者無洲無渚無伴無侶無涯無際無處無所能爲萬物之祖宗非目視非耳聞非形色非幻魂能爲三

林三

十五

界之根門其正者先離形次泯情不依物不
拘生可以合大道通神明有用曰神有形曰
身無爲曰道無相曰真應物而號隨物而造
常住常存不生不老理合萬德事出千巧事
雖無窮理終一道無有證者無有得者有妄
曰愚無妄曰真真水釋水妄水結冰冰水之
二其體不異迷妄曰愚惺真曰智其冰也冬
不可釋其水也春不可結故愚不可即改智
不可即待漸釋漸消以通乎大海斯可謂自
然之道運用玄玄非念慮所測當可以綿綿
不可以勤勤夫進道之由中有萬途困魚止
瀝病鳥棲蘆其二者不識於大海不識於叢
林人趨乎小道其義亦然此可謂久功中止
不達如理捨大求小半路依止以小安而自
安不及大安而安矣其大也悞蕩無涯含識

一體萬物同懷應則千變化則衆現不出不
沒用無有間有心無形有用無人示生無生
示身無身常測不測常識不識爲而無爲得
而無得無形而形無名而名物類相感和合
而生生而不生其無有情衆謂之聖衆謂之
明種種稱號各任其名然其實也以無爲爲
宗無相爲容等清虛同大空究無處所用在
其中其得者一其證者密得則不一證則不
密然非不一然非不密夫學道者習無餘不
學道者習有餘無餘道近有餘道疎知有有
壞知無無敗真知之知有無不計於有有
於無不無有無不見性相如如夫神通變化
者其猶於龍昇天覆宇宙者其猶於雲凝斯
未可貴斯未可真若取其爲實者而未爲道
也或有形而麗或有語而辨或有智而聰或

有用而巧若取以爲道者亦未爲善也有必
不真作必不常乾坤尚壞器物何剛唯道無
根虛湛常存唯道無體微妙常真唯道無事
古今常貴唯道無心萬物圓備故道無相無
形無事無意無心善利羣品率意人倫可謂

林二

十六

一切物無不賓夫萬物有侶唯道獨存其外
無他其內無腹無內無外包含太一該羅八
冥周備萬物其狀也非內非外非小非大非
一非異非明非昧非生非滅非麤非細非空
非有非開非閉非動非靜非歸非逝非剛非
柔非獨非對所以然者若以言內通合法界
若言其外備應形載若言其小包裏彌遠若
言其大復入塵界若言其一各任其質若言
其異妙體無物若言其明杳杳冥冥若言其
昧朗照徹明若言其生無狀無形若言其滅

林二

十七

今古常靈若言其麤束入塵廬若言其細山
嶽之軀若言其空萬用在中若言其有闡然
無容若言其開攝入塵埃若言其閉義出無
際若言其動湛然凝重若言其靜忙忙物聳
若言其歸往而不辭若言其逝應物還來若
言其剛摧挫不傷若言其柔力屈不厄若言
其獨恒沙物族若言其對真一孤轂故道不
可以一名言理不可以一義宣蓋略陳其說
何能以盡其邊是以斬首灰形其無以損生
金丹玉液其無以養生故真生不滅真滅不
生可謂常滅可謂常生其有愛生惡滅者斯
不悟常滅愛滅惡生者斯不悟常生其迷悟
二名不見真成取捨之意隨虛妄情故常空
不有常有不空兩不相待句句皆宗是以聖
人隨有道有隨空道空空不乖有有不乖空

兩語無病二義雙通乃至說我亦不乖無我
乃至說事亦不乖無事以故不爲言語之所
轉也夫鑄金爲人但觀其人不觀其金其名
也迷其相也惑所以然者皆失乎真然則一
切皆幻虛妄不實知幻是幻守真抱一不染
外物清虛太一平等不二圓通一身不遺一
法不得一法不修一法不證一法性淨天真
而謂大道乎是以徧觀天下莫非真人孰得
此理同其一倫其學者希其得者微可謂渺
漠而難知其知者師其化者夷無心動作作
而無爲無爲而爲無所不爲和光任物物無
所羈夫天地之內宇宙之間中有一寶秘在
形山識物靈照內外空然寂寞難見其號玄
玄巧出紫微之表用在虛無之間端化不動
獨而無雙聲出妙響色吐華容窮視無所寄

號空空唯留其聲不見其形唯留其功不見
其容幽顯朗照物理虛通森羅寶印萬象真
宗其爲也形其寂也冥本淨非瑩法爾圓成
光超日月德越太清萬物無作一切無名轉
變天地自在縱橫恒沙妙用混沌而成誰聞
不喜誰聞不驚如何以無價之寶隱在陰入
之坑哀哉哀哉其爲自輕悲哉悲哉晦何由
明其寶也煥煥煌煌朗照十方闐寂無動應
用堂堂應聲應色應陰應陽奇特無根虛湛
常存瞬目不見側耳不聞其本也冥其化也
林二
形其爲也聖其用也靈可謂大道之精其精
甚真萬物之因凝然常住與道同倫故經云
隨其心淨則佛土淨任用森羅其名曰聖

御選語錄卷第二

音釋

濟須音峻切 潢上音光切 痲上音黃切 邈音莫切
 也音五鄂切 痲下音黨切 邈音莽切 邈音莫切
 使音考之 疋音烏光切 穀音古祿切 阿音胡得切
 使音實也 疋音汪 穀音谷 阿音胡得切

林二

十九